

Atleta Quincy Breel

“Bo no por ta algo cu bo no stima”



ORANJESTAD- Quincy Breel ta un atleta di 22 aña cu a renuncia na scol EPI pa persigui su soño. Breel den e entrevista aki ta conta Bon Dia Aruba di su pasion pa su deporte cual ta atletismo y su deseo di no tin un bida “normal”.

Breel ta conta cu e la laga scol paso e no ta pensa cu na EPI tabata e scol adecua pe, cu e no por a lanta tur dia pa haci algo cu e no ta stima. Prome cu atletismo Breel ta subraya cu e tabata practica basketball y su prome deporte tabata baseball. Segun Breel e la cuminsa atletismo cu 17 aña paso e la tende di su amigo cu e deporte ey atletanan ta biaha hopi. “Na cuminsamento mi tabata, wel ban bisa no bon. Pero mi no a rindi. Mi a cuminsa train mas duro y asina mi a bira miho miho.” Breel ta conta cu e ta busca pa ta un ehempel pa su ruman homber mas chikito.

Meta den bida y futuro

Breel ta haci mas aparte di ta un atleta. E ta canta tambe y aparte di esey e tin un trabou



di 8 ora cu e ta balansa cu su deporte. Breel ta conta cu e tin dianan extremadamente largo caminda e ta sali di trabou directamente pa training. Breel ta splica cu e no kier tin un bida normal, cu esey ta su meta mas grandi. Normal siendo e persona cu ta traha un trabou, despues ta forma famia, despues ta retira etc. Su meta ta pa tin hopi exito den bida cu su deporte.

“Mi kier ta un deportista exitoso, cu placa suficiente pa por mantene mi ser keru nan. Aki 5 aña mi ta wak mi mes

pafo di Aruba. Participa na wega nan olimpico. Mi inspiracion ta exito, no tur locual ta briya pero mi carera como deportista. E fama no ta necesario pero mi ta supone e lo bin automaticamente” Breel ta enfatisa.

Bon Dia Aruba a puntra Breel con e ta wak e mundo di deporte na Aruba y cual ta e posibilidad pa atletanan na Aruba. Pa cual Breel a contesta cu e ta wak un avance hopi grandi den e mundo di deporte na Aruba. E ta wak mas atleta ta sobre sali den



nan deporte. Aunke ta cu un team completo of den forma individual. Y si sigui asina di berdad tin un oportunidad grandi di pone Aruba riba mapa den mundo di deporte.

Bay pe

Breel ta conta cu su mensahe pa tur mucha cu di un manera of otro kier participa den

mundo di deporte, pero no tin confiansa den nan mes. Ta pa nan bay pe y no laga niun hende descurasha nan. Semper keda bringa pa locual nan kier aunke otro hende ta keda bisa cu e ta imposibel. “Trabou duro semper ta duna fruto. Bo no por kere bo ta bay haya mundo si bo no traha pe” Breel a comenta. □

